

**Inatsisartut aalajangiiffigisassaattut siunnersuut, Naalakkersuisut peqquneqassasut nalunaarusioqqullugit, utoqqaat immikkut nappaataat tarnikkullu nappaatigisinnaasaannut akimut suleqatigiinnik pilersitsinerup pitsaaqutaanik ajoqutaanillu nalunaarusiornissamik. Nalunaarusiattaq qulaajassavaa aningaasaatigut allaffissornikkullu pisortanut kingunissai suliassaqarfiit akimorlugit utoqqarnut immikkut ittumik nappaatinut tarnikkullu nappaatilinnut suleqatigeeqalernissamut. Nalunaarusiaq UPA 2025 nallertinnagu Inatsisartunut agguanneqareersimassaaq (Inatsisartunut ilaasortaq Anna Wangenheim, Demokraatit)**

### **Akissuteqaat**

(Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoq)

### **Siullermeerinnineq**

Akissuteqaat Peqqinnissamut Naalakkersuisoq, Agathe Fontain, suleqatigalugu suliarineqarpoq.

Naalakkersuisut Inatsisartunut ilaasortamut, Anna Wangenheim, Demokraatit, siunnersuummut attuumassuteqartumut qujassuteqarput.

Naalakkersuisut siunnersuummi ajornartorsiutit saqqummiunneqartut nassuerutigaat. Naalakkersuisut utoqqaat pillugit periusissiaanni suliaqarnermi ersarissivoq, puiguttorneq pillugu suliniutit nukittorsarnissaannik pisariaqartitsisoqartoq. Naalakkersuisut anguniagaraat, puiguttorneq pillugu suliniutit nukittorsarneqarnissaat, tamanna periusissiami Naalakkersuisut allaatigivaat.

Utoqqaat pillugit periusissiami Naalakkersuisut suliniuteqarput ilaatigut puiguttorneq pillugu passussinermi suliamut ilisimasalinnut aamma qanigisanut ilitsersuummik pitsanngorsaanissamik. Peqatigalugu Naalakkersuisut utoqqaat illuanni puiguttortunut immikkoortotaqarfinnik pilersitsisinnaaniassammata aningaasaliissutinik immikkoortitsipput, taamaalillutik puiguttortut sapinngisamik eqqissisimaarniassammata aamma peqatigalugu najugaqartut allat puiguttortuniit immikkoortinneqarniassammata.

Periusissiaq suliarineqarmat, Naalakkersuisut eqqumaffigaat suliniutinik naammassineqarnissaannut piviusorsiorunik suliaqarnissaaq. Naalakkersuisut puiguttortormut suliassaqarfik nukittorsarniarlugu, aamma Peqqinnissaqarfiup iluani avataanilu, periarfissanik allanik amerlasuunik ujartuipput. Taamaalilluni aamma suliassaqarfiit akimorlugit suleqatigiit pillugit isumaliuutit, soorlu siunnersuuteqartup siunnersuutigisaatut.

Taamaattoq taamanikkut Naalakkersuisut inerniliipput, suliassaqarfiit akimorlugit assersuutigalugu peqqinnissaqarfiup kommunillu akornanni ajornartorsiutit tunngaviunerusumik aaqqiiffigineqartariaqartut, oqartussat akornanni akisussaaffimmik agguataarineq ersarissarneqassasoq, taamaalilluni innuttaasunut pitsaanerpaamik ataqatigiinnerpaamillu aaqqissuussamik pilersitsisoqarluni. Tamanna aamma Peqqinnissaq pillugu ataatsimiititaliarsuup inassuteqaatigaa. Naalakkersuisut Peqqinnissaq pillugu ataatsimiititaliarsuup inassuteqaatai piviusunngortinnarlugit aningaasaliissutinik immikkoortitsipput. Suliaq tamanna aallartereerpoq. Naalakkersuisut peqatigalugu

eqqumaffigeqquvaat aaqqissuussaaniq allannguinerit ukiuni amerlasuuni suliaqarluni piviusunngortinniartarmata.

Nassuiaammut siunnersuutigineqartumut atatillugu Peqqinnissaqarfik naalakkersuisoqarfiillu attuumassuteqartut ajornartorsiutit eqqumaffigivaat. Puiguttormik suliniutinut aporfinni annerpaaq pingaarnertut tassaavoq sulisussarsiorneq. Peqqinnissaqarfimmut sulisussarsiorneq assut ajornartorsiutaavoq, puiguttormik suliniutinik nukittorsaasinnaasoq. Ilaatigut pineqarput nakorsat piginnaasallit, suussusersinermik pisariaqartinneqartut.

Taamaalillutik Naalakkersuisut isumaqarput nassuiaatinik amerlanerusunik suliaqarnermiit periuseqarluni iliuuseqarneq sunniuteqarnerusinnaasoq. Nassuiaasioq isumalluutinik pisariaqartitsipput sivirusumillu suliarineqartarlutik aamma iliuuseqarnissamik killiliisinnaallutik, nassuiaammi inerniliinerpiaat utaqqineqartarmata. Taamaattoq Naalakkersuisut isumaqarput, nassuiaatit ilisimasaqarnerulernissamut sakkussaasut pingaaruteqartut, kisianni pisumi matumani inerniliinerit ilisimaneqareerput. Tassunga atatillugu taaneqarsinnaavoq, Peqqissutsimut tunngatillugu isumaqatigiissummi isumaqatigiissutigineqareertutut misissueqqissaarnerit ingerlanneqareermata, ilaatigut nuna tamakkerlugu tarnikkut nappaatilinnik sullissinermik ineriartortitsinissamik pilersaarut pillugu suliaqarnermik kinguneqartoq.

Naalakkersuisut isumaqarput, iliuuseqarnissamut aamma suliniutit aallartereersut pillugit suliap nanginneqarnissaannut pisariaqartitsisoqartoq. Tamanna tunngavigalugu Naalakkersuisut siunnersuut itigartitsissutigineqassasoq inassuteqaatigaat.

Naalakkersuisut sinnerlugit pitsaasumik oqallinnissassinnik kissaappassi.